



partii naleraq

UKA 2016/035-00

11-11-2016

**Apeqqueteqaat aallaavigalugu oqallinnissamik siunnersuut: Ineqarnikkut aaqqissuusseqqinnerup innuttaasunut amerlanerpaanut ataavarnerusumik iluaqutissangortinnissaa qanoq qulakkeerneqarsinnaava aammalu inuiaqatigiit akornanni akissarsiakinnerit akunnattumillu isertitaqartartut akilersinnaasaannik ineqarnikkut qanoq aaqqissuussinnaavugut.**

(inatsisartunut ilaasortaq Jess Svane, Siumut)

Inatsisartunut ilaasortap Jess Svane-p, Siumumeersup apeqqueteqaat aallaavigalugu oqallisissiaa Partii Naleraq sinnerlugut imaannak oqaaseqarfigissuarput:

Oqallisissiami apeqqutit ilisarnartorpassuit saqummiunneqartut Partii Naleqqamiit paasilluarparvut.

Apeqqutit ataasiakkaarlugit akissuteqarfiginissaat soqutiginaraluartoq, taamaattoq ataatsimoortumik oqaaseqaateqarfiginissaat pingaartipparput, tassami sineriarujussuatsinni pissutsit ilaanni assigiikannersumik aaqqiivigineqarsinnaanerat takorloorneqarsinnaangaluartoq, pingaartumik A/S INI-p innuttaasunik sullissinerat eqqarsaatigalugu. Taamaattoq tusartaannarparput sumiiffimmiik sumiiffimmut A/S INI-p kiffartuussinera assigiinnngissinnaasartoq.

Taamaattumik apeqqutaalluinnarunarpoq A/S-INI-miit kiffartuunneqarneq sumi qanorlu ingerlanneqarnersoq ?

Tassami A/S INI-miit kiffartuunneqartut ilaasa malugisimasaat kiffartuunneqartullu sumiiffinni assigiinnngitsuni misigisimasaat qanoq pitsaatiginersut imaluunniit qanoq naammaginnartinneqannginersut misissuiffigineqarnissaat pisariaqarmat.

Assersuut: Ukiaq manna ataatsimiinnitsinni innuttaasut ilaanniit saaffigineqarpugut, A/S INI-p aquaasa ilaanut inissiamut iserternermi, inissiaq iserterfigineqartoq eqqiarneqarsimangitsorluunniit.

Alla aamma saaffiginnippoq, inissiap kuuffiinut tunngasut ajortissimmammata, soorunami A/S INI-mi sullissisut saaffigineqarnerisigut, kuuffik pineqartoq iluarsaanneqarsimasoq, kisiannili iluarsaassineq,

inissiap naliginnaasumik aserfallassimaneranut attuumassuteqaraluartoq, iluarsaassinermut regning-i A/S-INI-p bank-ikkoorlugu attartortumut akilersissimagaa.

Pissutsit taamaattut akuersarneqarsinnaanngillat.

Illumut inimik attartortut ulluinnarni aserfallatsaaliinermut aamma akilersuitinneqartalissagamiik?

Taamaammat Partii Naleqqamiit piumasaraarput, Partiinullu tamanut Naalakkersuisunullu kaammattuutingaarput A/S INI- p ingerlatsinera ineqartunillu kiffartuussineranut tunngasut inoqarfinni tamani nalilersorneqarlutillu misissuiffigineqartariaqartut.

Tassami nuna tamakkerlugut ineqarnikkut pissutsit ataatsimut qiviassangaanni nassuerutigalugu oqaatigineqartariaqarpoq, ineqarnikkut annertooujussuarnik ajornartorsiuteqartugut.

Namminersorlutik Oqartussat Sanaartornermut Iluarsaassinernullu aningaasaateqarfia 2015-imi suliaassanik 1 milliard koruunit sinnerlugit nalilinnik kinguaattooqqavoq.

Inissiarpassuit Namminersorlutik Oqartussanit pigineqartut iluarsaannissaannut koruunit milliard-it qulit sinnerlugit amerlassuseqartut oqaatigineqarpoq.

Inissiarpassuit ilaat inoqaratik attartortunut allanut aningaasaqarnikkut nanertuutaapput.

Inissiat ilaat, ineqartut ilaannit ukiut 40-t 50-it angullugit attartortut ilaannit najungarineqarput. Taakkualu ilaat assersuutigalugu aningaasarsiorunnaariataarneq akiliisinnaajunnaariataarneq allamilluunniit pissuteqartumik qaammatini marlunni akiliinngippata ernertumik anisinneqarnissaat sulissutigineqalertarpoq, naak inuit ilaqutariilluunniit pineqartut ukiorparujussuarni akilersuinerikkut inip pineqartup nalinga sinnerlugu akileereersimangaluarpataluunniit.

Partii Naleqqami isumaqarpugut inissiaatileqatigiiffiit ingerlanneqarnerat ineqartunut akisoorujussuaq taamaatinneqartariaqartoq, ineqartummi ingerlatsineq taama akisutigisoq akissaqartittuaannarsinnaanngilaat.

Tassami ullumikkut inissiaatileqatigiiffiit allaffissornikkut ingerlatsinerat, direktør-it akissarsiaat, biileqarnerat ilaallu ilanngullugit akisoorujussuit ineqartut akilersorpaat.

Ineqartut inigisaminnik pisisinnaanerat/tiguisinnaanerat ullumikkorniit inatsisitigut eqaannerusumik periarfissinneqartariaqarpoq, inissiap qanoq sivisutigisumik najorneqarsimanagera, pisoqaassusia il.il. nalilersorneqarsinnaasariaqarput.

Inuit ilaqutariippassuillu akissarsiakittut akunnatumillu aningaasarsiaqartut assorujussuaq angummanniapiloorput, inuit ilaat naammattunik akissarsiallit boligstøtte-p illuutigisimasaanik akikitsunnguannorlugit pisiortorput, qularnanngitsumillu iluarsaassinernut pisortat sanaartornissanut iluarsaassinissanullu aningaasaliissutigisartagaat 20-20-60 ukiuni 20-ini taasersugassaannngitsunik erniaqanngitsunillu atuillutik pisiortorput, inuit pissakinnerit tamakkiisumillu akiliisinnaanngitsut pisortaniit ineqarnermut tapiissutigisartagaat (boligsikring) atorlugu iluanaaruteqartarlutik.

Illumut taamaattoqarsimappat pissutsit taamaattut unitsinneqartariaqarpoq, tassami ilumoorsinnaanngilaq illutoqqat taamaattut atorlugit attartortitsinerit ilaatigut qaammammut 10 tusinde kr-it angullugit akiliisinneqartarsimappata.

Boligsikring-ip taamatut atorneqartarnera piaarnerpaamik unitsinneqartariaqartoq piumasaraarput.

Aamma piumasaraarput ineqarnermut pisorta qarfirmiit suliakkiissutigineqartartut tamarluinnarmik politikikkut akisussaasunit isummerfigineqaqqaarlutik akuerineqaqqaarlutillu suliakkiissutigineqartassasut.

Taamaaliornikkut suliakkiisarnerni kammalaatersorluni suliakkiissutit suliakkiissutaasartullu pinaveersimatinneqalissammata.

Taama naakkaluamik oqaaseqarluta oqalliseqqinnissamut piareersimanerput nalunaarutingaarput.

Anthon Frederiksen